



# NEW PEOPLE'S ARMY

## North Central Mindanao Region

Pamahayag  
Pebrero 14, 2020

### **DAGHANG SALAMAT KANINYO! MAHAL KAMO SA NPA.**

Karong Adlaw sa Pagminahalay, gustong ipaabot sa NPA-NCMR ang among kinasing-kasing nga pagpasalamat sa masang mag-uuma, mamumuo, kabus, kabatan-onan, kababayan-an ug uban pang demokratikong pwersa sa inyong mapadayunon nga pagsuporta ug pagmahal sa inyong hukbo.

Ang padayon ninyong pagmahal ang among inspirasyon ug motibasyon atubangan sa mga kalisdanan ug sakripisyong tukmod sa nagkagrabeng pasistang atake sa rehimeng US-Duterte sa atong rehiyon. Nahimo kining tinubdan sa among kusog ug determinasyon aron pursigidong iaslang ang demokratikong rebolusyon sa katawhan hangtud sa hingpit nga kadaugan.

"Kung wala ang hukbong bayan, walay bisan unsa ang katawhan." Napamatud-an na kini sa 51 ka tuig nga pag-alagad sa NPA sa katawhang Pilipino. Tungod sa suportang masa, dili mawad-an og bili ang pagsukol sa hukbo sa katawhan. Padayon kining makakab-ot og mga kadaugan alang sa pag-aslang sa gubat sa katawhan sa tanang natad. Nagapabilin ug nagalambo kini, ug dili mapildi sa kaaway.

Tungod sa inyong walay-puas nga pag-amoma ug pagmahal, nagapabiling dili mabuntog ang NPA.

Isip ganti sa NPA ngadto sa masang pinahimuslan ug dinaug-daog, nagapabilin kaming tinuod nga hukbo ug tig-alagad sa katawhan. Atubangan sa walay hunong nga pasistang mga atake sa rehimeng US-Duterte ug nagkagrabeng katilingbanong kahimtang, masaligan ninyo nga padayon namo'ng panalipdan ang inyong mga katungod ug kaayuhan. Kanunay'ng nagapatigbabaw ang inyong interes sa among mga ginapakigbisog, lakip na ang pagpaaslang sa tinuod nga reporma sa yuta, pagwagtang sa kapobrehon ug kagutom, pagdepensa batok sa militarisasyon ug langyaw'ng pagpanghilabot ug uban pa'ng ginaaslang nga mga pakigbisog sa katawhan. Kauban ninyo ang NPA sa pag-aslang ug pagpundar alang sa gipangandoy nato nga makab-ot ang usa ka tinuod nga gobyerno sa katawhan.

Taliwala sa mga pagsulay sa rehimeng US-Duterte nga pugngan ang pagpakaylap sa mensahe ug pagkamakatarunganon sa armadong pakigbisog, nagapabilin kamong lig-on ug wala nagpa-ilad. Dili mapatuman ni Duterte ang iyang pangandoy nga mahimong diktador tungod sa inyong hugot nga pagbabag ug pagsukol. Tibuok kaisog ninyong gikundena ang martial law sa Mindanao, ang paglangkob niini sa tibuok nasud ug ang malangkubong kampanya sa kabangis sa rehimen. Tungod sa inyong walay-kahadlok nga pagsukol ug panaghiusa, nagapabiling pakyas ang rehimen sa unsamang pagsulay nga ipa-surender ang NPA ug rebolusyonaryong kalihukan.

Bisan unsa na ang mga pakana sa gobyerno ug AFP aron lang ipagawas nga wala nay suportang masa ang armadong rebolusyon. Apan sama sa niagi, nagpabilin lamang kining pakyas. Labaw'ng nahimong tin-aw nga dili kanus-aman mapakunhod sa tiraniko, limbungan ug walay kasing-kasing nga rehimeng US-Duterte ang padayong gina-antos nga kalisod sa katawhang Pilipino.



# NEW PEOPLE'S ARMY

## North Central Mindanao Region

Sa pikas bahin, tungod sa padayon ninyong pagmahal sa NPA, mas napalig-on nga bugtong ang armadong pakigbisog ang dalan batok sa estadong nagluhud-luhod sa dikta sa imperyalista ug mga militarista. Labaw lamang niining ginatukmod ang lapad nga katawhan aron panalipdan ang ilang mga katungod. Labaw lang nga napaduol ang ilang kasing-kasing ug huna-huna sa armadong rebolusyon.

Busa, walay kinutuban ug walay-puas ang pagpasalamat sa NPA-NCMR sa tanang ginamahal namong masa. Hangtud adunay ginadaug-daog ug gipahimuslan ug sa gawi sa pagmahal sa masa sa tinuod nga hukbo sa katawhan, nagapabilin ang among panawagang "Alagaran ang katawhan!" kinabuhi man ang among ihalad.

Happy Valentine's Day! Daghang salamat kaninyo!

Mahal mo sa NPA.

**New People's Army**  
**North Central Mindanao Region**